

Šentencija mesopusta „ZADOVOLJAN“ 1970. godine

1

AVDITOR

Za običaj srce boli
Ja san opet na von stoli
Malo klobuk da popravin
Prije nego vas pozdravin
Pozdrav šaljen ovdi v gradi
Sin mještanon i paradi
Mesopustu milon gostu
V februarskon ovon postu
Radi našeg običaja
Mi ne jimo samo jaja
Neg glojemo bravje kosti
Zač je mesa danas dosti
Spravljamo ga v frižidere
A doma se malo dere
Pak bribirci moji mladi
Ki ste danas ovdi v gradi
Za običaj šijte gaće
Belo platno to domaće
Stari ote vas podržat
Avditor san ja već stari
Ki za vu stvar jako mari
Pak ako j ki slušat voljan
Mesopust je zadovoljan
Ča pokojna nisu braća
Zač nan vrime se obraća
Otel bin bit na visini
Za v lipi grad od starini
Počel je bil nebog tinjat
I slabo se već spominjat
Jedva j disal on neboški
Va općinskon jadnon čoški
Potegnuta j druga žica
Naša mjesna zajednica
Ovdi čitan spred paradi
Čast nan saka drugu Vladi
Ona ovog prošlog leta
Punin svojin cveton cveta
Načinila j v Bribir dovog
Gori v Štale za vodovod
Simitir se j sav uredil
Prije j jako malo vredil
Isto tako zadnjih dana
Uredjena j Sokolana
TAMBUR

AVDITOR

Zatin stiže potez novi
Igrališće na Čokovi
Pak je tamo zbog propusta
Maknut i grob mesopusta
To nij važno da j znad cisti
Zač on ima značaj isti

2

Brzo će tu da se pljeska
Za našega ovdi BESKA
Sad s Novljani dno krojimo
Malo bodih mi brojimo
Za sada j to isto tača
Jedan bod na dva igrača
Vidit je to i po znački
Lovac ako jako puše
Mačkove odriže uše
Zgljedal je na bumbarata
I on izlet skroz na Vrata
Zač ne more igrač saki
Pobrat tamo i vritnjaki
Do današnjeg drže danka
Treto mesto od podanka
I zato se čini meni
V BESKI loptu frču ženi
A imaju dosta znanja
Stigle su i pojačanja
Valjda ote na prolići
Malo bolje biti srići
Kad se igra utakmica
Kosmati su ovi dica
Priko ramen pali vlasi
Kot jačmenovi da su klasi
Zajednici mjesnoj bravo
Va njoj stvari teku zdravo
Najviše j dal za nju Vlada
Pohvala mu ovdi spada
Novi kurs je sada zela
Manje sjednic više dela
Praksa j prije bila naša
Daj sastanak koti maša
Diskusija vavik vela
A nikad se niš ne dela
Obično se isto trubi
Sotin narod vrime gubi
Va von prošlon lanjskon leti
Načinjeni su si objekti
Do lani se niš ne mjenja
Bribiri od oslobodjenja
Makar kakove bil časti
Koj do sada bil na vlasti
Obnovilo se nij ni metra
Od vrimena kralja Petra
To je sasvin drugo sada
Dokli rukovodi Vlada
TAMBUR

AVDITOR

Problem još je jedan veli
Va bribirskon ovon seli
Narod drhćuć čeka busa
Na klupici kraj Isusa

Pak se totu Bogu moli
 Smiluj nan se ovd i doli
 No i zato Vlada išće
 Zadnja vrime i mestišće
 Da se dela čekaona
 Brzo će bit tu i ona
 A dobar je komad dela
 Viševica na se zela
 Ča se tiče bravarije
 A drugi ju neka zije
 Šest stanic već Bribir ima
 Ča ni Rika toga nima
 Doduše su nika sela
 Sakupile malo mela
 Uzidale čekaoni
 Tri su već na ovoj zoni
 Čini mi se da j najzadnja
 Uzidana nadno Kadnja
 Isto tako i va Vidi
 Stoje zgoru dva tri zidi
 A na Rampi ljudi moji
 V čekaoni šodar stoji
 Zidarija j sada vela
 Narod jako kuće dela
 Saki drugi čovik išće
 Redon brajdu za mestišće
 Pak neka se baren zije
 I ne bude kot i prije
 I to ovd i va Bribiri
 Izgradnja se neka širi
 Zač su zbilja zadnji časi
 Da se oganj ne ugasi
 Oganj naših pradjedova
 Va vrimenta ova nova
 Zavičaj nas doma vuče
 Va njen lipše srce tuče
 Celi život ki j va sviti
 Na njega se vavik siti
 Pak ov Bribir naš nigdanji
 Zač da bude sada manji
 Ki god se je va njen rodil
 Sakuda j po svitu hodil
 Da bi za kruh on zaslužil
 Familiji život pružil
 Danas kad smo va slobodi
 Manje se gre priko vodi
 Zadnje vrime kot se vidi
 Lipo i na zemljovidi
 Ljudi opet ča nan biže
 Ali sada malo bliže
 Va evropske zemlje redon
 Nij ni tamo bači s medon
 Mi ki ovd i smo ostali
 I nan dosta toga fali
 Nismo prošli ča va vozi
 Niki mora mlist i kozi

Tesat kolci i pričnice
 Prpošit se okol dice
 Spravljat slamu za vu benu
 I zabavljat doma ženu
 Ali zadnje nan baš leta
 Ov običaj slabo cveta
 Stariji se tamo neda
 Spod konuli grdo gljeda
 A mlaji su još balavi
 Zano pero na vrh glavi
 Pak jih onda još špotamo
 Mesto da njin ruku damo
 Vele da nij vino voda
 Običaj je stvar naroda
 Tribamo ga skupa čuvat
 I va jednon lonci kuhat
 To nan je se čaj ostalo
 Običaja starog malo
 Da nan se to ne utare
 K vragu sih nas vuku pare
 Ove riči ke blebečen
 Ne smatrajmo danas smečen
 Nijedan se nek ne jadi
 Ki je danas ovd i v gradi
 Saki j prišal tu da sluša
 Šentenciju ka peruša
 Pak ako se ki spomene
 Da ne gre tlić valje mene
 Ako dobi ki god pasić
 Zač ga oču sabljun rasić
 Toj oružje bez dozvoli
 Ki običaj ov naš voli
 Ako niš se ne pročita
 Narod pogljed va me hita
 A kad koga se spomene
 On napada velje mene
 Da ne dojde sad do toga
 Ja se držin prava moga
 Na današnji dan to znate
 Prava na niš vi nimate
 Jer si vaši komentari
 Običaj ne ruše stari
 Sada dobri moj narode
 Čitan redon naše zgode
 Nij se teško ča se mora
 Da napadnen malo Ora
 Toj naš Martin s Podkostanja
 Ki ne pozna svoga panja
 Ovo nisu šupe priče
 Redon v gori drva siče
 Pa kad šnjimi na put zide
 Pravi vlasnik po nje pride
 Očel posić ili sadit
 Na me se ne mora jedit
 TAMBUR

AVDITOR

Zadnje vrime v politiki
 Nij ubijen lider niki
 Nastaju se teži dani
 Politika j vražja vani
 Vjetnami rat vavik traje
 Se na štetu jadne raje
 Ka se pati i pogiba
 Merikanon se to triba
 Nimaju ni svoje riči
 Samo njima ovo sliči
 Počeli su širit meje
 Kašnje rata do Koreje
 Onda sotin dalje stižu
 I delaju sviton grižu
 A kad jednuč Vjetnam stane
 Drugdi ote nicat rane
 Češka isto slabo diše
 Bratstva va njoj i nij više
 Niti bratstva niti slogi
 Rusi njin natlače rogi
 Zato sada slabo stoji
 Kad joj drugi pravdu kroji
 Lipšaj puno sada slika
 Kako zgljeda nan Afrika
 Taj kontinent složan sada
 V sakoj zemlji črnac vlada
 A ne više tuje sile
 Ke su tamo vavik bile
 Portugezi, Belgijanci
 Francuzi i Merikanci
 Svit je celi uprl oko
 V Alžir, Tunis i Maroko
 I va druge zemlje mlade
 Ke budućnost svoju grade
 Pak je sada i naš Tito
 Čaj od njega plemenito
 Šal posjetit ovi kraji
 Tel bi pomoć jadnoj raji
 To su zemlje va razvoji
 Kot i dite va povoji
 I Biafra j zemlja mala
 Do sada se j malo znala
 Va njoj bolest i glad vlada
 I pomoć joj triba sada
 Našoj zemlji dal je muki
 On potres va Banja Luki
 Ta lipi grad na Vrbasi
 Proživiel je strašni časi
 Porušil je redon zgrade
 I tvornice koje rade
 Celi svit je pružil ruku
 Dal pomoć za Banja Luku

TAMBUR

AVDITOR

Sada gremo redon dalje
 Pročitat van oću valje
 Stvari naše tu lokalne
 Poteškoće naše stalne
 Ovo leto nij stvar ista
 Do Lokve se dela cista
 Red je da se asfaltira
 Ov odvojak do Bribira
 Ogulinska ova dalje
 Neće na red još prit valje
 Raskopana j do kaldrmi
 Velik promet po njoj grmi
 Nijedan se na nju ne da
 Vele da j već tretog reda
 Kamioni v sakon dani
 Vuku drva i balvani
 A nijedan više neće
 Po njoj šodar da razmeće
 Pak se naši ljudi jade
 V prašini salatu sade
 V leti j vavik oblak dima
 Veli potok kad je zima
 Da ju j prekopat na Guči
 Da to narod već ne muči
 Poduljin je složno selo
 Sada ima velo delo
 Stari klanci proširuju
 Više put se mini čuju
 Zgljedat oće kao cesta
 Još oće bit za bus mesta
 Ako mu da Trans dozvolu
 Da se spusti z Vrbi zdolu
 Planiraju na križanji
 Štacijon načinit manji
 I va Graci na srid sela
 Obavlja se tlaka vela
 Dokli jedni proširuju
 Drugi zato i ne čuju
 Pa kad se vrag zadešpeti
 Na srid puta stresa smeti
 I jadni se sada plaču
 Kljane Grga za gromaču
 Zač mu nisu ciment klali
 Kot ča su mu obećali
 TAMBUR

BRANITELJ

Opet ja san jako tačan
 Pozdrav nosin van srdačan
 Pozdrav od sih sudac svita
 Šentencija kad se čita
 Abukat san jako čuven
 Sudac će bit danas zuven
 A ti suče bez ispita
 Nijedan te niš ne pita

Mesopusta neć osudit
 Niti njemu ča naudit
 Branit ja san njega voljan
 Zač je sada „ZADOVOLJAN“
 On pred nami ovdi sidi
 Da ga celi narod vidi
 I tebe se niš ne boji
 Zač on ima ljudi svoji
 Ki ga ote tu zastupat
 Još te mogu i nalupat
 TAMBUR

AVDITOR

Slušan benu i ne hajen
 Argumenti dalje dajen
 Sada znamo da ni sveci
 Nisu gori na Miseci
 Oću van reć sada valje
 Moraju bit nigdi dalje
 Ovoj telo našal golo
 Merikanski brod Apolo
 Po njen ljudi su šetali
 Ničesar se nisu bali
 Pak su oni još dapače
 prnesli i ilovače
 Ili nike zemljurini
 Ja bin rekal misečini
 Stručnjaci se tomu čude
 Tamo da su čiste rude
 Jedan dan će v pasju veru
 Letit vapor na Veneru
 Zvezda ka nan večer miže
 Bit nan oće puno bliže
 Koga vruga nać te tamo
 To za sada još ne znamo
 Morebit su na Veneri
 I bibrirski sad „Biseri“
 Dobili su bili popust
 Jedno leto na mesopust
 Za put prema toj planeti
 Raspali se v iston leti
 TAMBUR

BRANITELJ

Stel videli ljudi čuda
 Ča van čita bena luda
 Sada j načel već i svemir
 Samo da načini nemir
 Koga vruga ti planeti
 On spominje va von leti
 Nismo vridni vrlo često
 Va red klast ni svoje mesto
 A čemu se dizat vajer
 Ov je sudac pravi frajer
 Branit ja gren mesopusta
 Kroz službena moja usta

Branit oću i vas š njin
 Služeć pravon se prijašnjin
 Da vidimo kakvo sada
 Va Bribiri stanje vlada
 Da bin mogal se pripravit
 Pod nos sucu akti stavit
 Da počnemo od najmlajih
 Ne od onih ča su v jajih
 Neg od dice naše miće
 Do voštane smrtne sviće
 Ča se tiče omladini
 Ne moren ni reć od slini
 Mladež nan je još se gora
 Krivo vrime tu bit mora
 Podaci su ovo vidni
 Dečki su nan si obidni
 Pa ako su još i s plaćun
 Na divane već ni s ćaćun
 Uprav evo ovdi piše
 V Bribiri j takovih više
 Divojki su se po staru
 Misle na no i na karu
 Na ženidbu i na tanac
 I oćel prit kakov janjac
 Zane stvari već pobožne
 A za ke su dosta složne
 Moda sada nan jenjava
 Ki ča oće sa su prava
 Oćel oblič šos il gaće
 Dugačke il sasin maće
 A ka pojde dečka prosit
 Ne mora jih sobun nosit
 U blaga j to isto jaće
 Za mačkih nij već veljače
 Po prirodi to je proti
 Saki misec vrug se koti
 Morali bi mački divi
 Sada imit prezentivi
 Ki vrug na to pak utiče
 To su jako duge priče
 TAMBUR

AVDITOR

Ljudi sača vavik melju
 Pak me slušaj branitelju
 Na njemu je sa krivica
 Pokvarena ča su dica
 Ki još grizu samo keksi
 A već znadu ča su seksi
 Toj se krivnja mesopusta
 Kaša mu se kuha gusta
 Zato sada veruj meni
 Dani su mu odbrojeni
 Sada j prišla vražja nika
 I k nan simo bit muzika

Cele noće ta vrag strže
 Stari jedva korak drže
 Ne more se tancat pri ton
 Ovladala j celin sviton
 Zadnje vrime va Bribiri
 Ov se tanac jako širi
 Zada doma na dno sela
 Piva sastav „Kampanela“
 Gazda j doli poli kruha
 Zač on nima dosta sluha
 Napamet mij ta stvar pala
 Ovoj ljudi samo šala
 Naše mesto ustaničko
 Najzad je i turističko
 Zato j sada prava zgoda
 Totu j asfalt a i voda
 Priko leta j stranac bolji
 Da divojku zadovolji
 Va ton posli to nij mana
 Ne triba njin ni divana
 Bila grda ili lipa
 Bez divana on napipa
 Rukun najde tamo prečnik
 Zato mu ne triba rječnik
 TAMBUR

BRANITELJ

„ZADOVOLJAN“ je ispravan
 Ti još nisi njemu ravan
 Od njega si veći tovar
 Hitit ću te na tratoar
 Na keksi i cikuladu
 Dica pravo si imadu
 Ti si suče veći krivac
 Već si šal mi i na živac
 Ti si i kriv tomu suče
 Da se semu dica uče
 Još te imit s tog predmeta
 I peticu krajen leta
 Sad gren k ljuden od olova
 Niškoristi j već od lova
 Jednon lovcu kij već- zna se
 Jako bolno j bilo prase
 I još dokli j bilo hora
 Zval je pući i doktora
 Prase j doktor vižitiral
 Ma bolesti nij otiral
 Par dan kašnje je krepalo
 Gazda siče prase malo
 Bit mu oće bar za meku
 Kad na hajku v goru teku
 Zisikal ga j na komadi
 Nij videl da j bolan kadi
 Kad je sikal kraj pri riti
 Na razlog se tada siti

Pogljedal je šupku promjer
 Znutri špijal je toplomjer
 TAMBUR

AVDITOR

Branitelju budi miran
 Zač ja ovdi komandiran
 Se nevolje ke nas prate
 Ne gredu va prilog za te
 Tehnika nan vlada redon
 retko ki gre već Tapredon
 Saki drugi karu goni
 I kroz Bribir i Zagoni
 Sej to lipo kad nij kvara
 Autina kad nij stara
 Nigda lakše čovik šveri
 Neg v auti kot šoferi
 Više put se društvo spravi
 Zvan Bribira na zabavi
 Pak neka se i to povi
 Jedno j društvo prošlo v Novi
 Onda dečki a i cure
 Zastavun kroz cirkul žure
 Cidi benzin zotih kolin
 Kad su prišli pod Stokolin
 Onda j hodil šofer Depić
 Skroz na Vrbu iskat čepić
 Dal su bili stigli kamo
 I dandanas to ne znamo
 Put je to bil jako gorak
 Benzin iskat kroz javorak
 TAMBUR

BRANITELJ

Ča šoferih mi napadaš
 Med furmanih valjda spadaš
 Pomutavel ti si skrozi
 Mesopust se v ton ne vozi
 Na njegove hitaš pleća
 Da krivica bude veća
 Gori ti si još od jarca
 Njega vuku dva magarića
 Nij auto saki star
 Zvan da j prišal z Renta kar
 Vrag je smutil jednu grupu
 Za stvar delat jako glupu
 Ico, Depić i Buneta
 Par dan prije starog leta
 I još š njimi Kršul Velja
 Ki Zastavun kola pelja
 Velja tira ovu dicu
 Polaže za prikolicu
 Istina j to ljudi gola
 Na Vrbu su prišle kola
 Zvrnuli je ispred maja
 Iskal ih je sam Tomaja

Vrag je vavoj našoj dicit
 Va Buneti i va lci
 On je jadan vavik va von
 Ja već ne znan ni skin pravon
 Još bin čagod mu povidel
 Ča san čul a nisan videl
 Se mi se ne drži uha
 Pravi Ane Miki Puha
 TAMBUR

AVDITOR

Za saobraćaj slabo marin
 Ta fah bolje pozna Marin
 Pelja kako mi se čini
 Bolji spol od Veletrgovini
 Kad je trisnul ove vile
 Samoga su ostavile
 Slično pelja Dika Mira
 V Bater gostih iz Bribira
 Kad muj dosta niš ne pita
 Van z auta sih zihita
 Pješačit je pasja vera
 Skrozi gori od Batera
 Ja se tomu isto čudin
 Daj pješačil Ive Rudin
 Navoj zbilja dugoj prugi
 Zač su bili dobri drugi
 Vavon dolci pod Barbarun
 Puno god je sotun karun
 Nike lakše nike teže
 Reć me dužnost sada veže
 Jože brenzu slabo stiska
 Zadnje vrime dosta triska
 Tako su mi ljudi rekli
 Šal je va vrt teti Tekli
 Samo kad nij ljudskih žrtav
 I kada nij niki mrtav
 Lahko nan sej š njimi šalit
 Opet ote karu palit
 TAMBUR

BRANITELJ

Dobro, stani grdi suče
 Sih auto k sebi vuče
 Va modi su Citroeni
 Zač su Fiće dosta leni
 Motornih je vozil manje
 Zač je velik porez na nje
 Procedura j to velika
 Manje ima prevoznika
 Već nij vidit ni Zastavi
 Nutri Frani a ni Slavi
 Pusti suče ta auta
 Makni mi se ovdic s puta

Ča me briga za auti
 Ili zijaj ili šuti
 V radioni u Dragana
 Svitlo sviti već od rana
 S auton se društvo spravlja
 Dragan v jutro to popravlja
 Pomore mu i tast Vina
 Kad razbije se kabina
 Bila Škoda ili Fićo
 Sprotu farba paš mu Mićo
 Pak šoferi si po redu
 K njemu drito nutar gredu
 Dogodi se kada tada
 Da auto v jamu pada
 Triba niki držat stražu
 Da potrefi va garažu
 TAMBUR

AVDITOR

Znan da ovo ti ne prija
 Njegova san mušterija
 Već mij dosta tih limuzin
 V jamu j prošal š njun Domuzin
 Da se ovo bolje slaže
 Vanu jamu od montaže
 Nego gremo malo dalje
 Na divojki i na halje
 Ča se tiče kurbarije
 Ista stvar je kot i prije
 Dokli muž va rozgah veže
 Drugi ženu mu doseže
 Kada fini š njin odnosi
 Brže mužu kafu nosi
 Okol njega se omilja
 Njemu j to san a ne zbilja
 Onda mu to pride milo
 I ne zna čaj v kući bilo
 I ki koga sad doseže
 Običaj me reć ne veže
 Bit će toga još i više
 Tako v Sveton pismi piše
 Sad slikaju gole dami
 I va Evi i v Adami
 Va sakoj su dvi stranice
 Gole grudi i stražnjice
 TAMBUR

BRANITELJ

O moj suče nač se loviš
 Tajne stvari da nan poviš
 Nisi više ženi vridan
 Zač si sudac ti obidan
 Spominješ mi niki člani
 Ki ti vrede još od lani
 Više zato ti mi nisi
 Kad pozdolu pajdaš visi

Branin našeg mesopusta
 Zač je prišal već do gusta
 On se sotin nij ni bavit
 Nitij ki ča o ton pravil
 Akoj zabol kojgod snaši
 Se su to aduti naši
 Isto toga ja ne delan
 A ta vrag je aktuelan
 Va današnje vrime naše
 Ta stvar paše mesto maše
 Mesto maše i spovidi
 Na srid cisti to se vidi
 Danas vavoj našoj eri
 Malo ki bez ženske šveri
 Kad medeni misec pasa
 Od čovika nij čut glasa
 Cugli v ruki zame baba
 A muž jadan je baraba
 A ki pak ne voli tuču
 Pojde ženi pod papuču
 I tako ti dani teku
 Gatalice kako reku
 Nigda to su bili popi
 A danaska horoskopi
 Ki sej pod kun zvezdun zlegal
 I kakovu j sriću stegal
 TAMBUR

AVDITOR

Kurbarija da gre k vragu
 Da spomenen i Mujagu
 Napamet van ja ne pivan
 Nasmēt će se tetac Ivan
 Ovo i nij vridno smihu
 Zač i ne gre već po grihu
 Imel je i lipi zanat
 Dokli mu nij zelo alat
 Kako ovo ki već svaća
 To nij alat on iz gaća
 Zač nij on već kot i prijē
 Toj alat od zidarije
 Puntaroli, martelinu
 Odnēso mu j na brzinu
 Zidarija j njemu hobi
 Zelo j alat iz konobi
 Usto j zelo bocun vina
 To su tati daj milina
 Kadij on bil va tu dobu
 Kad su tati šli v konobu
 Ne bi ni čul on bil zanje
 Da dvajset let ima manje
 TAMBUR

Baš san slušl ta tvoj divan
 Nij tomu kriv tetac Ivan
 Neg ki ovo štivo slaže
 Čini mi se da on laže
 Sada j druga ona nika
 Čaj doživēl Kršul Mika
 Za letriku on je majka
 Sej to bilo poli Rajka
 Nij se nadal toj nezgodi
 Trefilo sej va zahodi
 Na nu školjku se j naprtil
 Malo da se nij usmrtil
 Raspala se j usrid dana
 Školjka čaj od porculana
 Razletela na sto kusih
 Va Podskoči poli Tusih
 Baš mi se po glavi mota
 Past va jamu nij sramota
 Dokumenti stižu novi
 O garaži Sudenovi
 Sada j ovdī tema moja
 Črni, Mladen, Jože Spoja
 Pak je tamo prvi put
 V jamu zletel Mladen Šut
 TAMBUR

AVDITOR

Ovo leto slabo braniš
 I uprav se loviš za niš
 Mesopusta braviš drugin
 Besedami jako dugin
 Zato dragi abukatu
 Sablja j njemu već na vratu
 Ne hodi prik običaja
 Zal neće bit nikad kraja
 Ja se s ovin jako dičin
 Nač ti ovdī sada sličin
 Velin dicu ću ti hranit
 Ako moraš ga obranit
 „ZADOVOLJAN“ on je danas
 Kako gljeda mīlo na nas
 Zač ča sada mu predstoji
 Pogljeda se moga boji
 Kriv je on za te se stvari
 I današnje društvo kvāri
 On gre brzo na Čokovo
 Vano svoje groblje novo
 TAMBUR

BRANITELJ

Dal čujete ovo ljudi
 Jel to sudac, sran ga budi

Pravo veli „ZADOVOLJAN“
 On bi dobio nedovoljan
 Daj trefil va školu hodit
 Gren ga valje sada pobit
 Ne bojin se ja ni risih
 Puni žepi su mi spisih
 I pečatih Isusa mi
 Daj ti svoji simo znami
 Da jih skupa mi spravimo
 Ovu benu izbavimo
 Nij on kriv za bedastoće
 Vidi skoro umrit oće
 Bil je hrabar nigda prije
 Kad nij bilo šentencije
 Danas kas je vrime novo
 Fanj nan vredi ovo slovo
 Pak mi se to reć i neda
 Kako na tu stvar ki gljeda
 Par let zadnjih a i lani
 Čast nan nose kapetani
 Onda ljudi s pravon vele
 Da smo si mi beni vele
 Reć van oću to po bablju
 Glavno j va von nosit sablju
 Zač kad pridu ludi dani
 Teret nose kapetani
 Kadi su nan oni stari
 Ova rič mi ritam kviri
 Sto let čovik da korača
 Ne moreš ni prit do mača
 Za sablju se vavik griže
 Drugo leto od nje biže
 Teško j prit do natresulje
 V ku najviše ljudi bulje
 Mesopust je stvar prosidbi
 Dokli pride do ženidbi
 Istoga nestane dana
 I sablja i kapetana
 Čin v paradi najdu mladu
 Mene više i ne znadu
 Mesopustu za zamenu
 Sad meljaju doma ženu
 To se s mojin pravon kosi
 Na koga se to odnosi
 Na prijašnjih kapetanih
 Danas nij već ni znat za njih
 TAMBUR

AVDITOR

Ča branitelj ovo trubi
 Zabadava vrime gubi

Kapetani ki su bili
 Ne mogu odoliti sili
 Kapa sablja i korica
 Kašnje to ne tende dica
 V običaji ton nij sriće
 Kad dobiju dite piće
 Onda hite ća paleti
 Va ton iston oni leti
 Za običaj već ne mare
 I spadaju već va stare
 Kapetani ki su bili
 Si su se ća odselili
 Niki j prošal va Njemačku
 Niki j doma našal mačku
 Žal mij da se to utare
 Ljudi zavo slabo mare
 Ki pak ovi retki piše
 more dodat puno više
 Ja kad ovo se pročitan
 Više se niš i ne pitan
 Ali on ki ovo piše
 Ne smi par dan van zić više
 Si se jade na ve riči
 Nan to ovdj dosta sličj
 Si će špotat autora
 Ako ćuti a reć mora
 Ako reće a ne ćuti
 Dobardana nij na puti
 TAMBUR

BRANITELJ

Spisi ovi va te hitan
 Stani valje da ne čitan
 Znan ja tvoje se besedi
 Obrana mi niš ne vredi
 Morda ćeš ti ubiti njega
 Mesopusta najzadnjega
 A krivica nij sa va ton
 moreš ga i ubiti baton
 Ostat će bar jedna snaga
 Običaju ka je draga
 Zato moji mili ljudi
 čujte kako sudac sudi
 Sebe ća krivicu hitan
 Ostavinu valje čitan
 Neću više vrime gubiti
 Ova će ga bena ubiti
 TAMBUR

AVDITOR

Sada moju sablju dižen
I vratu mu bliže stižen
Sada gremo na testament
Mesopusni j tu parlament
Pogubi ga sad moj maču
Za vu j dosta ga veljaču
(udarac)

Odvjetniče ća se nosi
Vidiš ki smo sada bos
Oporuka j kako sljedi
Fanj i va njoj piše redi
Ostavil je soj paradi
Ka je ovdj sada v gradi
Mesto šibi jedan prutić
Dozvolu za dičji vrtić
Onin starin ća su doma
Od škartoca gre diploma
Da bi kletu z kuće zišli
I v paradu simo prišli
Kapetanon redon dili
Kurdelicu ka j od svili
skoro si su mi se čini
Ovo leto iz Kričini
Osin mladog Peki lvi
Drugi nisu već ni živi
Nij se jadal on ni na nje
Kletu će jih bit još manje
A predvodi ovaj zbor
Kapelnik nan Ive Čor
Jadranku j dal jedne škare
Da bu lipši za mačkare
Želji pašuš on ostavlja
Zač se sada na put spravlja
Ostavil je kapelniku
Jednu curu pak veliku
Sada j on bil i Novljanski
Više v rodi nego lanjski
Od iste su slami bili
Ovu benu umisili
Imeli su oni sriću
Komaj našli slami vriću
Kupili su mi se čini
Jednu mažu na Kričini
TAMBUR

A bandiru ki nan nosi
Podskoči se š njun ponosi
Ki ju nosi z ovog sela
Čast za njega to je vela

Sopilašen daje sapi
I to one čaj spod napi
Neka pušu va trunbeti
I va drugon oni leti
A ki su to ne znan ni ja
Mislin da j i Varelija
Božo Šeto i Tus Mika
Šteta da nij Mirko Dika
I Anušić š njimi trubi
Va paradi na srid Vrbi
Vinko Depić honorarno
pomore njin ma ne stalno
Ostavlja njin staru trubu
Zaboravel nij ni Ljubu
A toj Ljubo naše Mari
Komedijant on je stari
I va njen je pasja vera
Dal mu j bocun od likera
A i Seržu teca Fabi
Kad bu otel neka rabi
Dečkon redon sin ostavlja
Divojku i puno zdravlja
A kij s vlasi da se šiša
Dečki baban kažu miša
Kapelnik mi veli Čor
Daj najbolji Ive Or
Med njimi je on najniži
Svelin bubnjen jedva biži
A paradi da bu kletu
Med njun mesta magaretu
Ostavil je magaricu
Ka će pratit ovu dicu
Po starinskon običaju
Dokli ovi dani traju
TAMBUR

Zajednici mjesnoj šalje
Lipi pozdrav sada valje
Neka opet lipo dela
Va srid ovog našeg sela
Lovcen je ostavil volju
S puškun teć po našen polju
Talijanih nij već v polji
Zač su našli teren bolji
Lovcen Viti i Zlatanu
Neka malo bliže stanu
Za njih je to vela srića
Pićega j dal njin kucića
Niki lovac to mi reče
Da slabo kroz travu teče

I moraju pred njen kosit
 Ako će njen divljač nosit
 Va Nonstopi sve je tačno
 Prit je sakon pristupačno
 Za sih ljudih i se ženi
 ki su dobri i pošteni
 nike babi nose siri
 I prodaju tu v Bribiri
 Jedna vavik ništo išće
 Najzad zame i sirišće
 Toj sirišće naše marki
 Ulovil juj Miko v parki
 O dobro ošpota tata
 Da njen ne gre već na vrata
 Korbač on njen sad ostavlja
 Neka tuku ki v žep spravlja
 TAMBUR

Sin Bribircen želi sriću
 Va von leti baren Fiću
 A muškarcen po principu
 Jednu mladu ženu lipu
 Zač nan bež nje nij života
 Da nas kljane a i špota
 Sin Bribircen ki su dalje
 Boku rožic redon šalje
 Pogotovo onin ljuden
 Da van ovdi iskren buden
 Ki su bili va paradi
 Makar bili neznan kadi
 Složili bi tri paradi
 Da su ovdi s nama v gradi
 Na rastanki braćo moja
 Već nan ne zna se ni broja
 Kletu bit će valjda bolje
 Oćemo bit bolje volje
 I običaj ov obnavljat
 Već se triba valje spravljat
 A ne vavik zadnji časi
 Tek tuliko da se spasi
 Zavo leto j dosta sega
 Bal san se ja i gorega
 Oćel ki se kletu spravit
 Za običaj ov obavit
 Kad vas gljedan ovdi z bliza
 Toj pitanje kot od kviza
 Morali bi i stariji
 Nać se va voj pantariji
 Vidit ćemo se u sredu
 Pozdravljan vas sih po redu
 TAMBUR

AUTORI:
Ugrin Pavao
 +
Ugrin Josip

AVDITOR:
Tonković Vinko

BRANITELJ:
Ligatić Zlatan

Bribir, 1970. godine

